



Terenga 5: Hōtaka 33 – Hei...mā/mō

He Mihi

I makamakawhana, i putakari a tūnohunu mā, a wheteke mā kia whaimana ai tēnei reo, e ai ki te ture. Mei kore ake aua mumu i hua mai ai ngā tini kaupapa whakakaurera i te reo pēnei i te hōtaka nei, i a Ako. Nau mai ki te ope taua e whawhai tonu nei kia ora tautini ai tō tātou reo ā haere ake nei.

Hei Mahi Whakarongo

Mei kore ake ērā kaupapa e rangona nei ngā waiata a ngā iwi puta i te motu. Hinewehi mā o Raukatauri tae atu ki ngā rōpū waiata o te motu, nō koutou te ariā, nā koutou te mahi nui, nō tātou katoa te whiwhi.

Anei ngā pātai hei whakautu mā koutou:

- 1) He aha te pānga o te ruru ki tēnei waiata?
- 2) E kōrerohia ana 'Te Hokinga Mai' o te aha?
- 3) Ko wai mā me 'tū tangata tonu' ki ō whakaaro?

Anei rā ngā reo rōreka o roto o Kahungunu me tēnei waiata rongonui.

He Whakamārama

Ka whai te pū 'mā' i te pū 'hei' i roto i te rerenga mēnā he mahi kei te whakaarohia.

- a) Anei ngā pātai **hei** whakautu **mā** koutou. (mahi = whakautu)
- e) Anei te waiata **hei** whakarongo **mā** tātou. (mahi = whakarongo)
- i) Koinei tētehi whakataukī **hei** whakaaro **māu**. (mahi = whakaaro)

Kei pōhēhē tātou nā te mea kei raro te 'whakaaro' i te wāhanga 'o' i te nuinga o te wā, me 'mōu' kē i muri i te 'hei'. Nā te mea he mahi te 'whakaaro' i tēnei horopaki, ka whai kē ko te pū 'mā'.

Anei ētehi rerenga e kitea ai te pū 'mō' i muri i te pū 'hei'.

- o) Koirā te whenua pai **hei** haerenga **mōu**. *That's a good country for you to visit.*
- u) Ko Wharehuia te taurira **hei** whakamaunga atu **mō** ō tātou whakaaro. *Wharehuia is the role model on whom our thoughts should dwell.*

He Mahi ĩ-papa

Whakaurua te kupu kei runga i te ĩpapa ki tētehi rerenga kōrero. Whakamahia ngā pū 'hei...mā/mō' i roto i te rerenga.

whakamāori

Hei Mahi

Whakaurua te 'mā', te 'mō' rānei ki te āputa i ia rerenga kōrero e whai ake nei:

1. Me hari koe i tētehi pēke hei raurau _____ ngā ika ka mau i a koutou.
2. Koinei te marae kua tohua hei nōhanga _____ tō koutou rōpū.
3. Ko korā te wāhi hei haeretanga ake _____ koutou.
4. Anei ngā timotimo hei paramanawa _____ koutou.
5. He aha rā he take hei kōrero _____ tāua?
6. E tū ana ia hei taurira _____ ana ākongā.
7. Koinei ngā tikanga hei whai _____ tātou.

Whakautu:

Mahi ĩpapa: Anei tētehi kōrero hei whakamāori mā koutou.

1. mō
2. mō
3. mō
4. mā
5. mā
6. mō
7. mā